

Visoki predstavnik odbacuje suspenziju Vijeća ministara u vezi Suda BiH

Visoki predstavnik, Paddy Ashdown, je danas objavio Odluku kojom potvrđuje prvobitnu odluku Vijeća ministara od 10. oktobra ove godine a kojom je bivša kasarna JNA određena kao sjedište Suda BiH. Odluka visokog predstavnika znači da će Sud BiH biti smješten u prostor ove kasarne.

Prilikom objavljivanja ove Odluke visoki predstavnik je izjavio: "Moje mišljenje je da, ukoliko su zločini zaista počinjeni u kasarni "Viktor Bubanj"/"Ramiz Salčin" tokom rata, to još više jača argument da se u ovu zgradu smjesti institucija čija će uloga biti da štiti ljudska prava pojedinaca i da kažnjava najteža krivična djela. Što prije Bosna i Hercegovina dobije djelotvoran državni sud prije će građani BiH povjerovati u pravdu koju zaslužuju, kao i pravnu zaštitu na najvišem nivou. Osnivanje državnog suda je suštinski dio reformi potrebnih za uspostavu sudskog sistema koji će biti u stanju da se bavi najtežim krivičnim djelima, uključujući organizovani kriminal i korupciju. Iz ovih razloga donio sam odluku da nastavim aktivnosti na uspostavi državnog suda u prostoru ove bivše kasarne kao što se Vijeće ministara prvobitno složilo".

Traženje prostora odgovarajućeg za smještaj Suda BiH, koji će imati preko 100 zaposlenih uključujući sudije, Tužilaštvo, administrativno osoblje, Sudsku policiju i zaposlene na obezbjedenju, traje već dvije godine. Značaj Suda, kao i broj osoblja, je značio da je potreban minimalan radni prostor od 4.000 m². Pored toga, morali su se uzeti u obzir sigurnosni elementi. I institucije BiH i međunarodna zajednica su razmatrali i druge moguće lokacije, ali iste ili nisu ispunjavale potrebne uslove ili je bilo potrebno obimno i

skupo preuređivanje. Dodatnu prednost bivše kasarne "Viktor Bubanj", je predstavljala činjenica da je projektirana i sagrađena kao sud. Evropska komisija se već složila da uloži 2 miliona Eura u potrebnu adaptaciju i renoviranje prostora "Viktora Bubnja".

Ured visokog predstavnika će ostati u kontaktu sa Međunarodnim tribunalom za ratne zločine počinjene na prostoru bivše Jugoslavije (ICTY) i entitetskim vlastima nadležnim za istraživanje ratnih zločina kako bi prikupio dalje informacije o optužbama koje su iznesene u vezi sa ovim zgradama. Visoki predstavnik je pozvao sve osobe koje posjeduju informacije u vezi sa ratnim zločinima da u potpunosti sarađuju sa ICTY-jem.